

四庫全書

子部

欽定四庫全書

子部

薛氏醫案卷二十三

詳校官太醫院醫士臣舒岱
編修臣倉聖脈覆勘

總校官原任中允臣王燕緒

校對官中書臣李斯咏

賛錄監生臣何青

欽定四庫全書

薛氏醫案卷二十三

明 薛已 訂

明醫雜著

風症

問左手臂攣縮不能伸舉手指拳縮肩背重墜有似筋牽引作痛伸縮間骨節處筋作痛左足大指中指常欲反張難屈左手指掌時常作麻指縫近掌處但覺有物

夾於其間左足底近前高突處如腫硬急脹摸之無形步履時只多如一氈墊者語言短澁拜起頭暉口眼喝斜舌根痰纏胸膈痰礙咽中有痰核左肋下有痰核不時打寒噤嘯噴呵欠便牽動手足之病左耳左面左體使手或粗衣摸擦則皮膚痛左腮左項左脇肋皆時常木而急如有物粘貼其上左體或頭項或手足作痒左眼時常有淚流凝不乾左口角似寬縱左面上似蟲蟻遊行被風吹襲左鼻孔清涕出即打噴嚏等症答大經

小絡貫串一身謂之脉。脉者血之隧道也。血隨氣行周流無停筋者周布四肢百節絡聯而束縛之此屬肝木得血以養之則和柔緩而不急。脈皆起於手足指端故十二經皆以手足名之。而筋則無處無之皮毛者屬肺主外而易於感冒。人身之血行於脉絡而外充於皮毛滲透肌肉滋養筋骨故百體和運動無礙。若氣滯則血滯氣逆則血逆得熱則瘀濁得寒則凝泣衰耗則運行不周滲透不徧而外邪易侵矣。津液者血之餘行乎脉

外流通一身如天之清露若血濁氣滯則凝聚而為痰
痰乃津液之變如天之露也故云痰遍身上下無處不
到蓋即津液之在周身者津液生於脾胃水穀所乘濁
則為痰故痰生於脾土也所以古人論中風偏枯麻木
酸痛不舉諸症以血虛死血痰飲為言是論其致病之
根源至其得病則必有所感觸或因風或因寒或因濕
或因酒或因七情或勞力勞心房勞汗出因感風寒濕
氣遂成此病此血病痰病為本而外邪為標其病中於

皮毛血脉經絡肌肉筋骨之間而未入臟腑故邪在皮
毛肌肉則不知痛痒麻木不仁如有物一重貼於其上
或如蟲遊行或洒洒寒慄或腫脹或自汗遇熱則或痒
遇陰虛則沉重酸痛邪入血脉經絡則手足指掌肩背
腰膝重硬不遂難於屈伸舉動或走注疼痛所陳諸症
皆外自皮毛以至筋骨之病凡脉所經所絡筋所會所
結血氣津液所行之處皆凝滯鬱遏不得流通而致然
也亦何必一一強度某病屬某經某病屬某臟而雜治

之哉若邪入臟腑則為危病而難於用藥東垣書論之明矣經云知其要者一言而終不知其要流散無窮此之謂也

愚按難經曰邪在氣氣為是動邪在血血為所生病經云陽之氣以天地之疾風名之此風非外來風邪乃本氣病也故諸方多言皆由氣體虛弱榮衛失調或七情過度以致真氣耗散腠理不密邪氣乘虛而入及其中也然左半體者肝腎所居之地肝主筋腎

主骨肝藏血腎藏精精血枯槁不能滋養故筋骨偏
廢而不用也河間曰風病多因熱甚俗云風者言未
而忘其本也經云汗出偏沮使人偏枯如樹木一枝
津液不到則此枝枯槁被風所害由此觀之實因肝
腎二經精血枯槁之所致也前症云云亦當察其形
症審其兼變而治之尤不可泥執於風經曰三陰三
陽發病為偏枯痿易四肢不舉亦未嘗必指於風也
其真中者當辨其中藏中府而治之眼聰者中於肝

舌不能言者中於心唇緩便秘者中於脾鼻塞者中於肺耳聾者中於腎此五者病深多為難治中血脉者外無六經之形症內無便溺之阻隔肢不能舉口不能言用大秦艽湯主之中腑者多兼中臟如左關脉浮弦面目青左脇偏痛筋脉拘急目瞤頭目眩手足不收坐踞不得此中膽兼中肝也用犀角散之類如左寸脉浮洪面赤汗多惡風心神顛倒言語蹇澀舌強口乾忪惺恍惚此中小腸兼中心也用麻黃散

之類如右關脉浮緩或浮大面唇黃汗多惡風口渴
語澁身重怠惰嗜卧肌膚不仁皮肉瞞動腹脹不食
此中胃兼中脾也用防風散之類如右寸脉浮濶而
短必鼻流清涕多喘胸中冒悶短氣自汗聲嘶四肢
痿弱此中大腸兼中肺也用五味子湯之類如左尺
脉浮滑面目黧黑腰脊痛引小腹不能俛仰兩耳虛
鳴骨節疼痛足痿善恐此中膀胱兼中腎也用獨活
散之類此皆言真中風之症治也其間亦有氣血之

分焉氣虛而中者右手足不仁用六君子湯加鈎藤
薑汁竹瀝血虛而中者左手足不仁用四物湯加鈎
藤竹瀝薑汁氣血俱虛而中者左右手足皆不仁用
八珍湯加鈎藤薑汁竹瀝其與中風相類者不可不
別如中於寒謂冬月卒中寒氣昏冒口噤肢攣惡寒
脉浮緊用麻黃桂枝理中湯之類中於暑謂夏月卒
冒炎暑昏冒瘧厥吐瀉喘滿用十味香薷飲之類中
於濕丹溪所謂因濕土生痰痰生熱熱生風也用清

燥湯之類加竹瀝薑汁因於火者河間謂五志過極
火盛水衰熱氣怫鬱昏冒而卒仆也用六味丸四君
子湯獨參湯之類內有恚怒傷肝陰火上炎者用小
柴胡湯之類中於氣者由七情過極氣厥昏冒或牙
關緊急用蘇合丸之類食厥者過於飲食胃氣不能
運行故昏冒也用六君子加木香勞傷者過於勞役
耗損元氣脾胃虛衰不任風寒故昏冒也用補中益
氣湯房勞者因腎虛耗氣不歸源故昏冒也用六味

丸此皆類於中風者也夫中風者內經主於風此真
中風也若河間主於火東垣主於氣丹溪主於濕皆
是因火因氣因濕而為暴病暴死之症類中風而非
真中風也治者審之卒中昏憒口眼喎斜痰氣上湧
咽喉有聲六脉沉伏此真氣虛而風邪所乘以三生
飲一兩加人參一兩煎服即甦若遺尿手撒口開軀
睡為不治用前藥亦有得生者三生飲乃行經絡治
寒痰之藥有斬關奪旗之功每服必用人參兩許以

祛其邪而補助真氣否則不惟無益適足以取敗矣
觀先哲用芪附參附等湯其義可見○大尹劉孟春
素有痰兩臂頑麻兩目流淚服祛風化痰藥痰愈甚
臂反痛不能伸手指俱攣余曰麻屬氣虛誤服前藥
肝火熾盛肝血乾涸筋無所養虛而攣耳當補脾肺
滋腎水則風自息熱自退痰自清遂用六味地黃丸
補中益氣湯不三月而痊○一儒者素勤苦惡風寒
鼻流清涕寒噤噴嚏屬肺脾氣虛反服祛風之藥肢

體麻倦瘓逎自出殊類風症余以為風劑耗散元氣
陰火乘其土位以補中益氣湯加麥門五味子治之
而愈○舉人干尚之素腎虛積勞足痿不能步履後
舌瘡不能言面色黧黑余謂腎氣虛寒不能運及所
發用地黃飲子治之而愈後不慎調攝而復作或用
牛黃清心丸之類發熱瘓甚誠似中風用祛風化痰
之類小便秘澁口舌乾燥仍用前飲及加減八味丸
漸愈又用補中益氣湯而痊○一膏梁之人素不慎

起居忽失音不能語神思昏憒痰涎上壅余謂河間
云夫瘡屬腎經虛寒其氣厥不至醫學綱目云少陰
氣至則嚙舌少陽氣至則嚙頰今失音腎氣不能上
接清陽之氣也不信仍用風藥後嚙舌始信余言先
用地黃飲子及六味地黃丸而愈○儀部素補之患
前症不信余言數服祛痰之劑後嚙舌而歿○一男
子體肥善飲舌本強語滋痰壅口眼喝斜肢體不遂
余謂脾虛濕熱痰涎所致用六君子煨乾葛山梔神

麵而愈○外舅年六十餘素善飲兩臂作痛余曰此脾虛有濕也不信恪服祛風治痰之藥更加麻木發熱體軟瘦壅腿膝拘痛口禁語澁頭目暉重口角寬縱痰涎流出兩月後遍身如蟲行搔起白屑始信余曰臂麻體軟脾無用也痰涎湧出脾不能攝也口斜語澁脾氣傷也頭目暉重脾氣不升也痒起白屑脾氣不能營也遂用補中益氣湯加神麴半夏茯苓三十餘劑諸症悉愈又用參术膏而痊○一男子元氣

素弱或頭目眩暈或肢體倦熱仲夏因勞役飲食不時兩手麻木肢體倦怠余以為暑熱傷元氣用人參益氣湯而愈○一男子卒中口眼喎斜言語不出惡見風寒四肢拘急脉浮而緊此屬脾胃受症故舌本強而不能言用秦艽升麻湯治之稍愈乃以補中益氣湯加山梔治之而痊○一婦人懷抱鬱結筋攣骨痛喉間似有一核服烏藥順氣等藥口眼歪斜臂難伸舉痰涎愈多內熱晡熱食少體倦余以鬱火傷脾

血燥生風用加味歸脾湯加丹皮山梔二十餘劑形氣漸健飲食漸加又用加味逍遙散十餘劑痰熱少退喉核少消更用升陽益胃湯數劑諸症漸愈但臂不能伸此肝經血少而筋攣耳用地黃丸而愈○一產婦兩手麻木服愈風丹天麻丸遍身皆麻神思倦怠晡熱作渴自汗盜汗余謂氣血俱虛用十全大補湯數劑諸症悉退又數劑而全愈但內熱用加味逍遙散而痊○一產婦筋攣臂軟肌肉抽掣皆屬氣血

虛用十全大補湯而痊

問兩腿自膝以下或時內熱或骨中覺熱或有一點酸痛熱者何

答此血熱也但是風病其血必熱惟其血熱故風寒之氣一襲之則外寒束內熱而為痛丹溪論痛風謂血熱得寒污濁凝滯所以作痛遇夜痛甚行於陰也遇風雨陰寒痛甚寒濕勝也又風病必血燥風木生火故血熱

生燥

愚按前論最為切當臨川陳先生云醫風先醫血血行風自減蓋肝藏血而至風又肝氣為陽為火肝血為陰為水若肝火旺則肝血必虛故凡風病多因肝經風火為患當推五臟相勝相生以益其血經云腎藏精而主骨故腎虛者則骨中熱或湧泉穴或兩脰兩足內熱多患骨痿以致不起屬足三陰虧損之虛熱耳滋其化源庶可保其生也○金匱高如齋兩腿逸則筋緩痿軟而無力勞則作痛如針刺脉洪數而

有力余曰此腎肝陰虛火之象也用六味地黃丸而
愈○知州韓廷儀先患風症用疏風化痰養血之藥
而痊其腿膝骨肉發熱作痛服十味固本丸天麻丸
益甚兩尺脉數而無力余以為腎水虛不能生肝木
虛火內動而作非風邪所致也不信又服羌活愈風
丹之類四肢痠軟遍身麻木痰涎上湧神思不清余
曰皆脾氣虧損不能營養周身又不能攝涎歸源先
用六君子加芎歸木香數劑壯其脾氣以攝涎歸源

又以八珍湯數劑以助五藏生化之氣以榮養周身而諸症漸愈乃朝以補中益氣湯培養脾肺夕以六味地黃丸滋補肝腎如此三月餘而安○一婦人因怒患瘧厥而蘇左手臂不能伸手指麻木口喝眼斜痰氣上攻兩腿骨熱或骨中酸痛服烏藥順氣散之類諸症益甚不時昏憒更加內熱晡熱余以為肝經血虛內熱生風前藥復耗肝血虛火熾盛而益甚也先以柴胡梔子散調養肝經氣血數日後用八珍湯

加釣藤鈎散諸症稍愈又用加減八味丸料少加酒
炒黃柏知母黑色者數劑諸症頓退乃服八珍湯柴
胡梔子散半載而痊後勞役即有復作之意柴胡梔
子散隨安

問有醫教以四物湯二陳湯間服後感於南星半夏不
可輕服之言二陳通不入口專用四物而痰藥亦少用
枳术丸可專服否

答此少差耳用血藥而無行痰開經絡達肌表之藥以

佐之血藥屬陰性頗凝滯焉能流通經絡驅逐病邪以成功也故古人以烏頭為半身不遂行經絡者此也蓋風疾原於血虛血熱挾火與痰經絡肌表之間病根在矣後因感冒涼風寒氣或因過飲助痰火或因惱怒逆肝氣遂成半身不遂之症世謂之風病其病成於肌表皮毛筋骨經絡之間末入五臟六腑故治之亦兼在外而不專於內若只用四物湯是專補內也此病之痰亦在經絡若只用枳术丸是亦專治內也須補養其內以

固其本治其外以去邪斯為可耳

愚按前症若因腎虛陰火而肝燥者宜用六味地黃丸生腎水滋肝血若因怒動肝火而血耗者用四物加柴梔丹皮茯苓以清肝火生肝血若因脾經鬱結而血耗者用歸脾四物二湯以補脾氣生肝血若脾氣虛而痰滯者用二陳加白朮柴胡健脾氣以化痰若因脾虛濕而風痰不利者用二陳加南星蒼朮防風脾氣鬱而滯者用歸脾湯加柴胡半夏腎經敗液

而為痰者用六味丸○顧憲幕年六十不慎飲食起居左半身手足不遂汗出痰壅或用參芪之類汗止神清左腿自膝至足指仍舊腫墜痰多作痛肝腎脾胃洪大而數重按則軟濇余以為足三陰虛朝用補中益氣湯加黃柏知母數劑諸症悉退但自弛守禁不能全愈○靳閣老夫人先胸脇脹痛後四肢不收自汗如水小便自遺大便不實口緊目瞞飲食難進十餘日或以為中臟公甚憂余曰非也若風既中臟

真氣既脫惡症既見禍在反掌焉能延之乃候其色
面目俱赤而或青診其脉左三部洪數惟肝尤甚余
曰胸乳脹痛肝經血虛肝氣否塞也四肢不收肝經
血虛不能養筋也自汗不止肝經風熱津液妄泄也
小便自遺肝經熱甚陰挺失職也大便不實肝木熾
盛克脾土也遂用犀角散四劑諸症頓愈又用加味
逍遙散調理而安後因鬱怒前症復作兼發熱嘔吐
飲食少思月經不止此木盛克土而脾不能攝血也

用加味歸脾湯為主佐以逍遙散調補肝脾之血而
愈後每遇怒或睡中手足搐搦復用前藥即愈○大
參朱雲溪母於九月內忽仆地痰昧不省唇口喝斜
左目緊小或用治痰調血之劑其勢稍緩至次年四
月初其病復作仍進前藥勢亦漸緩至六月終病乃
大作小便自遺或謂風中於臟以為不治余診之左
關弦洪而數此屬肝火血燥也遂用六味丸加五味
麥門冬歸一劑而飲食頓進小便自調隨用補中益

氣加茯苓山梔釣藤丹皮而安至十月復以傷食腹
痛作瀉左目仍小兩關尺脉弦洪鼓指余以六君加木香
吳茱升麻柴胡一劑而痛泄俱緩復以六君加肉果
補脂一劑諸脉頓平痛泄俱止余謂左關弦洪由肝
火血燥故左目緊小右關弦洪由肝邪乘脾故唇口
歪斜腹痛作瀉二尺鼓指由元氣下陷設以目緊口
渴誤作中風投以風藥以腹痛泄瀉誤作積滯投以
峻劑復耗元氣為害甚矣後卧火箱熱蒸太過致瘻

喘誤服寒涼之劑益甚後請診辭不治果歿○一婦人因怒仆地語言蹇澁口眼喝斜四肢拘急汗出遺尿六脉洪大肝脉尤甚皆由肝火熾盛肝主小便因熱甚而自遺也用加味逍遙散加鈎藤及六味丸尋愈○一老婦兩臂不遂語言蹇澁服祛風之藥反致筋攣骨痛余謂此肝火血虛所致用八珍湯補氣血用地黃丸補腎水佐以排風湯年餘而愈○一婦人經行口眼歪斜痰涎上湧此血虛而肝火動用加味

逍遙散加牡丹皮治之尋愈後因飲食停滯日吐痰
涎此脾氣虛而不歸經也用六君子二十餘劑而安
○一婦人因怒口眼歪斜痰涎上湧口禁發搐此脾
肺氣虛而肝木旺用六君子加木香鈎藤鈎柴胡治
之漸愈又用加味歸脾湯調理而安○一產婦勤於
女工忽仆地牙關緊急痰喘氣粗四肢不遂此氣血
虛而發痙朝用補中益氣湯加茯苓半夏夕用八珍
湯加半夏各三十餘劑不應此虛之未復藥力之未

及也仍用前二湯各五十餘劑尋愈○一婦人素有
內熱月經不調經行後四肢不能伸舒卧床半載或
用風濕痰火之劑不效其脉浮緩按之則濇名曰瘓
症屬風寒所乘用加味逍遙散加肉桂防風四劑頓
愈更以八珍湯調理兩月餘而瘥○一婦人素經水
過期因勞怒四肢不能屈曲名曰癰症此血虛而風
熱所乘先用八珍湯加釣藤柴胡漸愈更佐以加味
逍遙散調理而瘥○一婦人四肢攣屈煩痛自汗小

便短少畏見風寒脉浮弦緩此氣血虛而風寒濕熱
相搏先用東垣清燥湯漸愈再用加味逍遙散及八
珍湯加牡丹皮而痊○一婦人素有痰火忽然昏憒
癥瘕抽搐善伸數欠四肢筋攣痰涎上升此肺金燥
甚血液衰少而然也用清燥湯六味丸兼服尋愈○
一婦人肢節作痛不能轉側惡見風寒自汗盜汗小
便短少雖夏亦不去衣其脉浮緊此風寒客於太陽
經用甘草附子湯一劑而痊○一婦人因怒發搐嘔

吐痰涎口禁昏憒氣口脉大於人迎此氣滯而食厥
用平胃散加茯苓半夏木香治之而甦更以六君子
加木香漸愈乃去木香又二十餘劑而痊

問或謂二陳湯南星半夏一切燥藥止能治痰飲濕痰
其於陰虛火動之痰殊無相干且與補陰藥相反

答陰虛火動之痰不宜用南星半夏若中風偏枯麻木
症之痰當用南星半夏也蓋其感病在肌表經絡筋骨
之間耳

愚按丹溪先生云痰病之原有因熱而生痰者亦有
因痰而生熱者有因風寒暑濕而得者有因驚而得
者有因氣而得者有因食積而得者有脾虛不能運
化而生者若熱病則多煩熱風痰多成癰瘍奇症冷
痰多成骨痺濕痰多怠惰軟弱驚痰多成心痛癲疾
飲痰多脇痛臂痛食積痰多成癖塊痞滿其為病種
種難名竊謂前症若因腎水虛弱陰虧難降使邪水
上溢故多痰唾宜滋其化源其痰自消若因肝木侮

脾土而風痰壅滯者先用南星半夏清其痰後用六君子之類調胃氣痰自不生若槩用風藥耗其陽氣而絕陰血之源適足以成其風益其病也○冢宰劉紫岩因勞下體軟痛發熱痰盛用清燥湯入竹瀝薑汁服之熱痛減半再劑而全愈○庠生陳時用素勤苦復因勞怒口斜痰甚脉滑數而軟余謂勞傷中氣怒傷肝火用補中益氣湯加山梔茯苓半夏神曲桔梗數劑而愈○錦衣楊永興筋骨軟痛氣粗痰盛作渴

喜水或用愈風湯天麻丸更加痰甚體麻余以為脾腎俱虛用補中益氣湯加減八味丸三月餘而痊陶天爵妾媵素多時患頭暈痰甚勞則肢體痿軟筋骨作痛殊類風症余以為腎虛不能納氣歸源用加減八味丸而痊後因房勞氣惱頭暈項強耳下作痛此肝火之症仍用前藥滋腎水生肝血制風火而愈問倒倉吐痰不盡病根痰又甚作胸膈之上咽喉之下居多夜間更為所苦吐甚難出後服蘿菔子欲吐之因

空腹遂入大腸作痢

答病在腸胃者宜用之腸胃如倉格致餘論說明倒倉二字宜玩倉中有陳腐敗穀須倒之腸胃中有痰血積滯須滌蕩之牛肉屬坤土本補脾胃之物非吐下藥也特飲之過多滿而致吐下耳此借補以為瀉故病去之後胃得補而氣發生乃巧法也若病不屬腸胃者豈可輕用古人治風初病時痰涎壅塞胸膈阻礙經絡藥無所施故先吐去其痰方可施法今既倒倉之後豈可復

行吐下哉吐下之後再行吐而行下是虛虛也痰久積在胸膈腸胃者固宜吐下之但痰日逐生豈倒倉可盡其根但恐倒倉之後胃虛而痰易生故丹溪先生云宜補中氣以運痰也又皮膚經絡隧道之間俱為邪所客而阻滯少通則津液行於其間者亦聚而為痰於是日逐飲食入胃所生之津液不得流散而化為痰飲聚於胸膈上升於咽喉宜其多也此亦因外而傷內

愚按前症若因脾氣虧損痰客中焦閉塞清道以致

四肢百骸發為諸病者理宜壯脾氣為主兼佐以治痰則中氣健而痰涎自化若倒倉之後而痰反甚此脾氣愈虛則津液反為痰者理宜補中益氣非參术二陳之類不能治最忌行氣化痰及倒倉之法○州判蔣大用年五十形體魁梧中滿吐痰勞則頭暈所服皆清痰理氣余曰中滿者脾氣虧損也痰盛者脾氣不能運也頭暈者脾氣不能升也指麻者脾氣虛而不能周也遂以補中益氣加茯苓半夏以補脾土

八味丸以補脾母而愈乾坤生意方云丸人手指麻
軟三年後有中風之疾可服搜風順氣丸天麻丸秦
羌湯之類以預防之彼惑此而恪服之以致大便不
禁飲食不進而歿竊謂預防之理當養氣血節飲食
戒七情遠慳慎若服前藥以為預防適所以反招風
而取中也○秀才劉允功形體魁梧素不慎酒色因
勞怒氣頭暉仆地痰涎上湧手足麻痺時或面赤口
乾引飲六脉洪而無力甚數余曰肺主氣腎藏氣今

腎虛不能納氣歸源陽獨居上故作頭暉又不能攝水歸源飲停於中故化而為痰陽氣虛熱而麻痺虛火上炎而作渴當滋化源用補中益氣合六味地黃丸料一服而愈後勞役或入房即作用前藥隨愈問自倒倉後常覺口中痰甚而有熱頗易飢有痰常少用石膏瀉之稍可

答倒倉後胃虛不可用石膏脾胃陰血虛則陽火旺火能消食故易飢暫用石膏瀉胃火故覺效然非正法只

以白朮補脾而用白芍藥生血甘草緩中瀉火陳皮茯苓行痰則王道之治也

愚按倒倉之後而火反旺者乃脾胃虛寒之假象也設認為實熱則誤矣東垣先生脾胃論言之最詳若人氣高而喘身熱而煩或揚手擲足口中痰甚者屬中氣虛弱而變症也宜用補中益氣湯若人形怯氣弱畏惡風寒或肢體踳攣而痰上湧者屬脾氣虛弱而不能攝涎也宜用六君子湯若兼口角涎流者屬

脾氣虛寒而不能主涎也用張氏溫脾散如不應急
用六君子加附子若因命門火衰不能生脾土者急
用八味丸若人素腎虛發熱或腎虛有痰者兼以六
味丸料若人素陽虛惡寒或腎虛有痰者兼以八味
丸料○一儒者脾腎素虛而有痰或用導痰之法痰
甚作渴頭暉煩熱余謂中氣虛弱而變症用補中益
氣湯而愈後勞役發熱頭暉此氣虛不能上升也用
前湯加蔓荆子而愈後又勞神畏見風寒四肢逆冷

口沃痰涎余以為脾氣虛寒之真病以六君子加炮
薑肉桂而愈○一男子素腎虛而咳嗽亦用導痰之
法虛症悉具痰涎上湧小便頻數余謂足三陰虛而
復損也朝用補養脾氣湯培養脾胃之氣夕用六味
丸加五味子收斂耗散之精而愈

問自倒倉後行動頗覺眩暈作痰每暈必於勞役後方
作又平日大便常不結實近亦結燥

答倒倉非正對病症故諸風病未見退而痰多便結頭

眩眼花皆吐下後元氣虛故也倒倉大腸少陽故結燥黃連苦寒性燥苦能燥濕寒能去熱黃連能實大腸平日大便常不實者乃腸胃中有濕熱因服黃連亦見結實

愚按倒倉之後胃氣受傷元氣虧損不能化生陰精而虛火內作以致前症也當甘補之經曰土位之主其瀉以苦其補以甘是也蓋頭暉眼花胃氣不能上升也大便不實脾虛不能約制也大便結燥者血虛

不能濡潤也經云腎主大便又云腎主五液若腎氣
調和津液滋潤則大便自然通調矣凡此皆宜實脾
土補肺金諸病自愈若因大腸火燥而大便秘結者
宜用六味地黃丸若因脾胃虛弱而大便不實用六
君炮薑若因脾胃虛弱而大便不實者須用四神丸
補中益氣湯○大尹陳克明導痰後痰益多大便不
實喜極熱飲食手足逆冷余謂命門火衰而脾肺虛
寒不能攝涎歸源用八味丸而尋愈○進士張禹功

飲食停滯胸滿噉痰或用藥導之痰涎上湧眩暈熱渴大便秘結喜冷飲食手足發熱余謂腎水虛弱津液難降敗液為痰用六味丸而愈

問近有欲為溫針者乃楚人法其法針於穴以香白芷作圓餅套針上以艾針溫之多取效

答古者針則不灸灸則不針未有針而加灸者此後人俗法也此法行於山野貧賤之人經絡受風寒致病者或有效只是溫經通氣而已於血於痰無預也古針法

妙甚但今無傳恐不得精高之人誤用之則危拙出頃
刻惟灸得穴有益無害日後宜行之

愚按針灸之法各有所宜亦各有所禁經曰形氣不
足病氣不足此陰陽俱不足也不可刺之刺之則重
不足重不足則陰陽俱竭血氣皆盡五臟空虛筋骨
髓枯老者絕滅壯者不復矣東垣曰脉浮數而發熱
咽乾面赤時渴者皆熱在外也亦可灸灸之灾害立
生由此觀之所禁所宜不可不慎溫針之法尤為乖

謬若用之於寒氣之腫八風之邪其庶幾乎

問酒飲數盃則手足和軟如無病者醫勸煮酒藥服之
何如

答酒溫行氣活血故飲少覺好但濕熱之味生痰助火
實能增病又此等病多有因酒後毛竅開氣血熱因為
寒風涼氣所襲而成惟五加皮一味浸酒日逐服數盃
於此病有益諸藥浸酒惟五加皮與酒相合且味美煮
酒時入五加皮於內泥之滿月後可服

愚按前方祛風活血之藥如不應當求其本而治之
此病治法活血行瘀開經絡通腠理內固根本外散病
邪但今倒倉之後中氣未復宜補中氣理瘀為重為先
人參亦可用也近日之藥重在理脾理瘀故今服四物
湯雖多而不應益血藥陰寒凝滯且下行故損胃氣胃
氣者上升之清氣也又春宜升而久服降藥逆天時矣
故云中氣虛而瘀易生也

愚按經云邪之所湊其氣必虛留而不去其病為實

若人脾胃充實營氣健旺經隧流行而邪自無所容
今倒倉之後脾氣愈虛法當補中益氣則中氣清和
而痰自化若因脾土虛寒或命門火衰者須用八味
丸○若因腎氣虧損水泛為痰或頭暉口乾者用六味
丸○一婦人元氣素虛勞則體麻發熱痰氣上攻或
用烏藥順風散祛風化痰丸之類肢體痿軟痰涎自
出面色痿黃形體倦怠而脾肺二脉虛甚此虛而類
風也朝用補中益氣湯夕用十全大補湯漸愈又用

加味歸脾湯調理尋愈○一婦人素性急患肝風之症常服搜風順氣丸秦艽湯之類後大怒吐血唇口牽緊小便頻數或時自乏余以為肝火旺而血妄行遂用小柴胡湯加山梔牡丹皮漸愈後大怒吐血誤服降火祛風化痰之劑大便頻數胸滿少食用清氣化痰之劑嘔而不食頭暉口乾不時吐痰用導痰降火之類痰出如湧四肢常冷余曰嘔而不食頭暉口乾胃氣不能升也痰出如湧脾氣不能攝涎也四肢

逆冷脾氣不能運行也用補中益氣湯加茯苓半夏
治之諸症漸愈又用加味歸脾湯兼服而安○鴻臚
王繼之室素有癇症遇勞役及怒氣則發良久自省
一日因飲食後勞役失宜發而半日方省不能言語
或以為風中於臟用祛風化痰順氣之劑及牛黃清
心丸病益甚六脉浮大兩寸虛而不及本部且進飲
食余曰此脾胃之氣傷也若風中於臟禍在反掌彼
不信仍用風藥後果卒

常避涼風寒露霧濕氣身熱四肢汗出或脫衣去靴襪之時莫當風取涼最易感也惱怒尤忌之酒後忌當風見涼脫巾襪後便用手多磨擦令毛竅閉此等病寒月固怕寒風暑月外熱毛竅開尤易感也

日後若灸火只灸手足上穴治風症者手上如肩窩曲池合谷等是也口歪斜可灸夾車承漿口面上艾炷須小手足上則可粗也灸火須自上灸下不可先灸下後

灸上

愚治一婦人口眼歪斜四肢拘急瘓延不利而惡風寒其脉浮緊此風寒客於手足陽明二經先用省風湯二劑後用秦艽升麻湯而愈○一婦人體肥胖頭目眩暈肢體麻木腿足痿軟自汗聲重其脉滑數按之沉緩此濕熱乘虛脾氣下流於腎肝之部也用清燥湯羌活湯漸愈更佐以加味逍遙散全愈

面上木處可將桂枝為末用牛皮膠和少水化開調敷之厚一二分

愚按前症若屬肺氣虛弱者補脾土如不應則補其土母

脚底硬木處可將牛皮膠熔化入生薑真汁調和仍入南星末五錢和勻用厚紙攤貼二三分乘半熟裹貼脚底上用溫火烘之此外治法也膠和薑汁方出內經用治脾病謂風寒濕三氣合而成病客於皮膚肌肉之間不知痛痒但不仁如木耳後人治腰硬作痛及手足痺木而兼痛者加入乳香沒藥或加羌活南星末用之多

效煎調要得法則如膏藥在手足腰者用熱鞋底熨之
愚按經云風寒濕三氣雜至合而為痺風氣勝者為
行痺寒氣勝者為痛痺濕氣勝者為著痺丹溪先生
云大率因血虛受熱其血已自沸騰或加之以涉水
寒濕熱血得寒汚濁凝滯不得運行所以作痛治以
辛溫佐以辛涼流散寒濕開通鬱結血行氣順無有
不安若因足三陰虧損當補元氣為主

敷貼是治皮膚肌肉針灸是治血脉經絡滋血是兼治

筋骨筋骨無血則不任矣

癱瘓痿軟之病此是無血及兼疫火濕熱耳古人云不可作風治而用風藥謂小續命湯西州續命湯排風湯等藥如羌活防風麻黃桂枝烏頭細辛等劑皆發散風邪開通腠理之藥若誤用之陰血愈燥也

愚按前症江南之人所致者多屬陰虛氣虛濕熱相火其癱瘓痿軟多屬手足陽明等經陰虛濕熱治者

審之

擬治諸方

治半身不遂手足欠利語言費力呵欠噴嚏面木口眼歪斜寬弛頭目眩暉痰火熾盛筋骨時痛或頭痛心悸

川芎

一錢
二分

當歸

熟地黃

生地黃

薑汁
水炒

牛膝

酒洗

橘紅

鹽水
洗

黃芩

酒炒

酸棗仁

炒各八分

紅花

酒洗

甘草

炙各四分

羌活

防風

柳桂

各六分

南星

製半夏

製白芍藥

酒炒

白茯苓

天麻

各一錢

白术

一錢

黃柏

酒炒五分

右水煎入淡竹瀝薑汁二三茶匙侵晨服

四物湯加紅花牛膝共六錢二分補血涼血活血二陳
湯加南星白术黃芩治濕痰風痰火痰再加竹瀝薑汁
以行肌表經絡之痰共五錢九分羌活防風天麻柳桂
皆行經絡肌表辛溫開發之劑引送血藥流散邪滯柳
桂橫行手臂牛膝黃柏行腰腿

白朮為君佐以茯苓甘草白芍藥橘紅半夏又以固脾
胃之氣血以運行諸藥輸送各經

酸棗仁佐川芎當歸羌活入肝治筋骨酸疼濕痺又佐

地黃當歸入心治心虛振慄

四物湯得羌活防風柳桂南星半夏為佐使則經絡肌表筋骨之血皆補其虛而活其滯矣

南星半夏二味雖燥共止二錢羌活防風柳桂雖辛溫三味止一錢四分通共三錢四分溫燥之藥加於血藥六錢二分之內况又有黃芩黃柏甘草苦寒甘寒藥共一錢五分多寡懸絕焉得燥吾之血耶此正君臣佐使分兩多少之法痰之為物遍身上下無處不到故古人

用二陳湯通治之隨其所在而用藥引導之今用天麻
南星竹瀝薑汁導之入手足經加以白朮黃芩降其膈
上之火痰

冬寒月減黃芩二三分或加炮川烏一分若用川烏減
桂只用一二分風病減去可去川烏桂減南星羌活若
素有火黃芩不必減

羌活風家要藥若寒涼月重有感冒可加至一錢有汗
而惡風此真感風症也可加桂枝六七分病減則減去

之川烏桂枝羌活防風南星等藥皆行經絡開發腠理之劑故治風家必用之風能燥故必用滋血潤燥藥邪既客於經絡肌表之中則津液不得流通凝滯而為痰飲故必用治痰風也血也痰也三者相因但各有輕重先後之不同或先因中風則治風為重或先因血虛血熱則治血為重或先因痰則治痰為重

愚按五臟之病相乘伏匿隱顯莫測參以徐用誠先生五臟治要尤善詳見一卷或問仲景處方藥品條

內

張仲景小續命湯是論風也劉張丹溪諸說是論血與
痰火也要在隨症推移消息之耳

愚按前症多因飲食失節起居失宜虧損元氣腠理
不緻外邪所侵或勞傷元氣怒動肝火皆屬內因所
致也前藥亦當審而用之○太宜人年七十五遍身
作痛筋骨尤甚不能伸屈口乾目赤頭眩痰湧胸膈
不利小便赤瀉而短少夜間痰熱殊甚遍身作痒如

蟲行此肝經氣燥而風動也用六味地黃丸料加山梔柴胡治之而愈○一男子時瘡愈後遍身作痛服愈風丹半身不遂痰涎上湧夜間痛甚余作風客淫氣治以地黃丸而愈○一老婦兩臂不遂語言蹇澁服祛風之藥筋攣骨痛此因風藥虧損肝血用八珍湯補氣血用地黃丸補腎水乃佐以愈風丹而愈○一婦人因怒吐痰胸滿作痛服二陳四物芩連枳殼之類不應更加祛風之劑半身不遂筋攣痙軟日晡

益甚內熱口乾形氣殊倦此足三陰虧損之症也余用逍遙散補中益氣六味地黃調治喜其謹疾年餘諸症悉愈形體康健

倒倉後脾虛痰盛宜先理中治痰且將風藥血藥減去俟中氣復然後通用

白芍藥 白术 各一
錢半陳皮八分 白茯苓 半夏 薑瓜
薑仁 人參 各一
錢 黃芩 酒炒枳實 炒甘草 炙各五分 桔梗
香附米 鹽水 炒各七分 麥門冬 麥芽 炒各七分 黃連 薑炒四分

右水煎入竹瀝三匙薑汁三匙服

若寒月覺胃中冷易泄加炒乾薑一二分

愚按前云倒倉後脾虛痰盛矣然而方內芩連瓜薑枳實之類苦寒泄氣尅滯之劑雖兼六君子之調補恐所益不償所損雖加乾薑一二分亦恐未能濟其寒也蓋痰之為病有因熱而生痰者亦有因痰而生熱者有因飲食積滯而得者有因腎水虧損津液敗濁而似痰者有因腎水不足陰火上炎而生痰者有

因脾肺氣虛不能攝涎而似痰者不能枚舉當各推
所因而治之然倒倉之後而痰反盛必因中氣復傷
所致故治痰用峻厲之劑而痰愈甚者乃脾氣愈傷
津液不能運化而然耳前症當補脾胃調中氣則津
液各歸其所而為元氣矣

倒倉後大便燥結頭暉眼花未除加當歸身尾桃仁去
皮尖各一錢川芎五分山藥一錢

愚按前方若因酒麯炙燄致痰膠固脾氣無虧者宜

用之若因腎氣虧損津液不足者宜用六味丸因脾

氣虛弱者宜用六君子湯因中氣虛者宜用補中益

氣湯因腎氣虧損水泛上而為痰者宜用六味丸因

脾胃虛寒小水不調肚腹膨脹者宜用金匱腎氣丸

○儒者王錄之素痰甚嘔吐之後大便燥結頭暉眼
花等症尺脉浮大按之則濡此腎氣虛而兼血虛也

四物送六味丸四劑諸症悉退仍用前丸月餘而康

○僉憲高如齋素唾痰服下痰藥痰去甚多大便秘

結小便頻數頭暈眼花尺脉浮大按之如無余謂腎家不能納氣歸源前藥復耗金水而甚用加減八味丸料煎服而愈○儒者楊文魁素唾痰諸藥不應服牛黃清心丸吐痰甚多或頭暈或熱從脇起左脉洪大有力右脉浮大而無力余曰此足三陰虧損虛火不能歸源用補中益氣加麥門五味及加減八味丸補其化源而愈○秋官張碧崖面赤作渴痰盛頭暈此腎虛水泛為痰用地黃丸而愈○儀制賀朝卿吞

酸胸滿痰盛作瀉飲食少思用清氣化痰等藥前症
益甚兩膝漸腫寒熱往来余謂脾胃虛濕熱下注用
補中益氣倍參术加茯苓半夏炮薑而愈○余甥范
允廸咳嗽痰盛胸腹不利飲食少思肢體倦怠脉浮
大按之微弱服二陳枳殼等藥愈盛余曰脾肺腎虛
也用補中益氣六味丸而愈○一婦人吐痰發熱遍
身作痛小便頻數陰中作痒日晡熱甚余曰此肝脾
血虛氣滯而兼濕熱也用加味逍遙散加車前子而

愈○一婦人懷抱不舒腹脹少寐飲食素少痰涎上湧月經頻來余曰脾統血而主涎此鬱悶傷脾不能攝血制涎歸源用補中益氣濟生歸脾二湯而愈專治痰加味二陳湯胃氣復後間服理痰

橘紅八半夏

薑汁炒

白茯苓

白朮

各一錢二分

甘草

連翹黃芩

炒前胡各五分

香附米

鹽水七分炒

瓜蔞仁

桔梗

各一錢

大麥芽

炒一錢

右水煎入生薑汁三匙竹瀝兩覲殼半飢溫服益治

痰藥亦以脾胃為主

愚按前方若因脾土太過營氣壅滯宜用之若因脾土不足營氣虛痞者宜補中氣為主若因肝木乘脾土者宜補脾土為主若脾土虛寒者宜補命門火為主○侍御譚希曾喘咳吐痰或手足時冷此中氣虛寒用補中益氣炮薑而愈○職坊盧抑齊飲食素少忽痰壅氣喘頭搖目劄揚手擲足難以候脉視其面色黃中見青此肝木乘脾土如小兒慢驚之症先用

六君子柴胡升麻而安更以補中益氣加半夏而痊○
考功楊朴菴嘔吐痰涎胸腹膨脹飲食少思左關脉
弦長按之無力右關脉弦長按之微弱此木克土用
六君子加柴胡山梔木香而愈○一儒者體肥仲夏
患痰喘用二陳芩連桔梗痰喘益甚加桑皮杏仁瓜
蔞盜汗氣促加貝母枳殼不時發熱飲食漸減脉大
而無力余以為脾肺虛寒用八味地黃丸以補土母
用補中益氣湯以接中氣而愈○一婦人早間吐痰

甚多夜間喘急不寐夫早間多痰乃脾虛飲食所化
夜間喘急乃肺虛陰火上衝用補中益氣加麥門五
味而愈

加味化痰丸 治痰滿胸膈咽喉不利

半夏

湯炮七次薑汁水拌滲透橘紅鹽水洗各三兩桔梗

海蛤粉

另研

瓜蔞仁

另研各一兩枳殼炒熟連翹

香附米

淡鹽水炒枯黃

芩

炒各五錢

貝母

去心炒一兩

诃子皮

枯礬各二錢

桔梗

各五分

右為末煉蜜薑汁為丸如黍米大淡薑湯下四五十

丸不可過服恐傷上焦元氣

愚按前症若因鬱傷脾氣脾血虛損用歸脾湯加炒梔柴胡治之若因怒動肝火脾土受尅用六君子加炒梔柴胡平之若因飲食傷脾營氣虛弱用六君子湯調之若因勞傷元氣用補中益氣湯主之東垣先生云胃為五臟之根本胃氣益虛脾無所稟五臟皆虛諸症絳起矣○二守陳子忠飲食少思吐痰口乾常服二陳枳實黃連之類脾胃受傷乃問於余余述

東垣先生曰脾胃之症實則枳實黃連瀉之虛則白
术陳皮補之彼遂以二味等分為丸常服由是多食
而不傷過時而不飢○徽州汪商常服二陳枳實黃
連青皮厚朴胸腹快利後患腹脹請治脉已脫余曰
至暮必歿已而果然故內經千言萬語只在人有胃
氣則生又曰四時皆以胃氣為本凡脉促代屋漏之
類或暴脫余急用參附等藥多有復生者

薛氏醫案卷二十三

欽定四庫全書

子部

薛氏醫案卷二十四

詳校官久醫院醫士臣舒岱
編修臣倉聖脈覆勘

總校官原任中允臣王燕緒

校對官中書臣李斯咏

謄錄監生臣朱坦

欽定四庫全書

薛氏醫案卷二十四

明 薛已 訂

明醫雜著

臍風

小兒初生百日內臍風方書率用南星殼蠶等風藥多不效當作胎毒瀉陽明火邪馬牙亦是胎毒用針挑破桑樹白汁塗之桑汁主小兒鴟口及口瘡舌上瘡神效

初生小兒時時與看頻傳桑汁不然舌硬緊漸至撮口難治

愚按曾世顯云嬰兒一七之內腹肚脹硬臍畔浮腫口撮不開攢眉而叫名臍風或因剪臍帶少短或因束縛不緊牽動風入臍中或因鐵器斷臍冷氣入內傳於脾絡致舌強唇青手足微搐不能吮乳啼聲似鴉喚痰潮響急掐破口泡去其毒水以艾灸臍中亦有復生者治法多端無如灸法或以天南星一錢生

薑自然汁調灌為妙

變蒸

小兒不時變蒸變者異常也蒸者發熱也所以變換五臟蒸養六腑須待變蒸多遍氣血方榮骨脈始長

愚按錢仲陽先生云小兒在母腹中乃生骨氣五臟六腑成而未全自生之後即長骨脉五臟六腑之神智自內而長自下而上故生後三十二日一變蒸始即智意異前蓋人有三百六十五骨除手足中四十

五碎骨外有三百二十數自生下骨一日十段而上
之十日百段三十二日計三百二十以為一變亦日
一蒸骨之餘氣一自腦分入齦中作三十二齒則齒
數當與變日相合然而齒有不及三十二數者由變
不足其常也有或二十八日即止長二十八齒以下
倣此但不過三十二之數凡一週遍乃生虛熱諸病
如是十周則小蒸畢也計三百二十日生骨氣乃全
而未壯也故初三十二日一變生腎生志六十四日

再變生膀胱其發耳與骯冷腎與膀胱俱生腎水水
數一故先變主之九十六日三變生心喜一百二十
八日四變生小腸其發汗出而微驚心為火火數二
一百六十日五變生肝哭一百九十二日六變生膽
其發目不開而赤肝主木木數三百二十四日七
變生肺聲二百五十六日八變生大腸其發膚熱而
汗或不汗肺者金金數四二百八十八日九變生脾
智三百二十日十變生胃其發不食腹痛而吐乳此

後乃齒生能言知喜怒故云始全也太倉云氣入四肢長碎骨於十變後六十四日長其經脉手足受血故能持物能立能行也經云變且蒸謂蒸畢而足一歲之日也師曰不汗而熱者發其汗大吐者微止不可餘治全嬰方云變蒸者長氣血變者上氣蒸者發熱也輕則體熱虛則體冷微汗唇生白泡三日可愈重者寒熱脈微腹疼啼叫不能乳食食而即吐呴五日方愈其後與傷寒相似但以唇上白泡驗之亦有

受胎氣壯實不熱不驚或無證候而暗變者竊謂此
症小兒所不能免不必服藥古方以黑散子素丸子
主之非惟臟腑不能勝受抑且反傷氣血慎之慎之
嘗見一小兒至二變發熱有痰或治以抱龍丸一粒
卒至不救可以驗矣然父母愛子之心勝稍有疾病
急於求醫而醫者不究病情率爾投劑殊不知病因
多端見症相類難以卒辨况古人稟厚方多峻厲之
劑緩服可也

潮熱

小兒潮熱或壯熱不退多是變蒸及五臟相勝不必用藥又多是飲食停積鬱熱由中發外見於肌表只理其中清陽明之熱而表熱自除不可認作外感輕易發汗用小柴胡輕利等藥重傷其內又潮熱不退恐是出痘亦當審察勿使用藥

愚按前症若因飲食停積或腹痛吐瀉或肚腹膨脹宜用保和丸以消導健脾若飲食既消或腹痛不食

或肚腹膨脹宜用四君子以保養胃氣若因誤行汗
下損傷元氣宜用參耆歸术陳皮甘草以補中氣大
凡傷食脾胃必損宜固胃氣庶無變症若寅卯辰時
熱者屬肝經也巳午未時熱者屬心經也申酉戌時
熱者屬肺經也亥子丑時熱者屬腎經也當詳其虛
實而治之凡屬虛熱實熱投以攻補之劑其病既不
增減乃是病根深固而藥力未能及耳須宜多服功
力既至諸病悉退切不可改為別治設或藥不對症

禍在反掌慎之○李閣老子患潮熱飲食如故自申酉時甚至子丑時方止遍身似疥大便秘結小便赤

澁熱渴飲冷余以為脾胃實熱傳於肺與大腸先用

清涼飲四劑結熱始退又用四物湯加柴胡黃連數

劑其瘡漸愈彼欲速效另用槐角丸之類諸症益甚

遂求於施院長亦用四物湯加柴胡黃連加桃仁赤

芍藥至百劑而愈

施院長名鑑
字銀臺弟

大小便白

小兒大小便時時審看小便如米泔或澄停少頃變作
泔濁此脾胃濕熱也若大便泔白色或如魚練或帶紅
或色黃黑此積滯濕熱也宜理脾消滯清中宮去濕熱
節飲食若忽然變青此是變蒸也不必用藥若久不愈
用補脾制肝藥一二服亦不宜多用

愚按小便如泔或大便泔白宜用肥兒丸若積滯黃
黑宜用四君子加黃連木香若色青日久不復或兼
泄瀉或兼腹痛當用六君子加木香芍藥若肌體色

黃小便不利髮黃脫落鼻下瘡痍嗜土少食大便青

褐色者須用梔子茯苓湯

詳見治疳
要藥下

小兒病多屬肝脾二經

小兒病大率屬脾土肝木二經肝只是有餘有餘之病似重急而為治却易見效亦速脾只是不足不足之病似輕緩而為治却難見効亦遲二經為病惟脾居多用藥最要分別若肝木自旺則為急驚目直視或動搖手足搐搦風痰上壅等症此為有餘宜伐木瀉肝降火清

心若脾胃虛而肝木來侮亦見驚搐動搖諸症但其勢
微緩名曰慢驚宜補養脾胃不可錯認將脾經悞作肝
經治也

愚按急驚乃風火之症脾土受制肝經實熱者用瀉
青丸徑伐其肝或導赤散以瀉其子肝經虛熱者用
六味地黃丸以滋腎水補中益氣湯以養脾土則風
木自息脾土自安矣若因乳食不調脾胃虧損木來
侮土似慢驚而見抽搐搖頭劄目咬牙等症宜用六

君子加鈎藤鈎若脾胃虧損寒水反來侮土成慢驚而見前症用前藥加薑桂如未應更加附子多有復甦者 舉人杜克宏子發熱抽搐口噤痰湧此肝膽經實火之症即急驚風也先用瀉青丸一服又用六味丸二服諸症頓退乃以小柴胡湯加芎歸山梔鈎藤鈎而安却用補中益氣湯而愈

急驚

急驚是有餘之症屬肝木心火陽邪太旺宜直瀉之降

火下痰是也五臟俱有陰陽如肝氣為陽為火肝血為
陰為水肝氣旺則肝之血衰矣火妄動則水被煎沸不
寧矣陽旺陰消風火相搏陰血走散勢所必至也故亦
宜養血急驚雖屬肝心然木火旺則肺金受虧不能平
木木來尅土斯損矣故亦宜養脾況治驚諸藥大率祛
風化痰瀉火峻厲及腦麝辛散之味易於消陰血損脾
胃者故治有餘急驚之症先須降火下痰一二服後加
養血安神之藥若飲食少大便溏或吐瀉則當兼補脾

胃若脾胃原虛當於直瀉藥中加補脾藥若屢作屢服利驚驅逐之藥便宜認作脾虛血散治驚藥內加養血補脾藥不可用溫熱丁香等藥恐助胃火宜參术芍藥等以補脾中氣血麥門冬黃連以清金制木

愚按前症若肝經風熱抽搐目瞤筋急痰盛等症用四物湯以生肝血鈎藤鈎以清肝火更用四君子以補脾土若肝經血燥發熱驚搐眼瞤痰盛筋攣用六味丸以滋腎水生肝血用四君子加芍藥以補脾土

生肺金若肺金尅肝木用六君子以實脾土芍藥木
香以平肺金若屢服利驚之劑而脾胃虛寒者須用
六君子以補脾胃加丁香木香以培陽氣若脾土虛
寒腎水反來侮土而致中寒腹痛吐瀉少食等症者
用益黃散以補脾土而瀉寒水庶幾不致慢驚矣治
當審察虛實凡症屬有餘者病氣也不足者元氣也
故有餘當認為不足思患預防斯少失矣

急驚變慢驚

急驚屢發屢治用直瀉藥既多則脾損陰消變為慢驚當主以補脾養血佐以安心清肺制肝之藥

愚按前症多因吐利脾胃虛損肝木所乘或腎水反來侮土所致故似搐而不搐先用釣藤飲子如發搐少退乃用寶鑑天麻散若吐利不食急用木香異攻散實其脾土其病自己如未應用六君子加木香炮薑溫補脾土更不應急加附子以回陽蓋慢驚之症外虛熱而內真寒也無風可逐無痰可驅但溫補脾

胃為主大凡發搐因風則目青面赤因驚則呴呼搐
搐因食則噦吐氣悶肺脾虛則生粘痰喉間作鋸聲
乃心火不能生脾土脾土不能生肺金以致肺不能
主氣脾不能攝涎故涎氣泛上而喉中作聲耳若用
祛風治痰理氣之劑則氣散陰消而促其危矣○太平王職方子患瘧疾恪用化痰之劑虛症悉至殊類
驚風謂余曰何也余曰小便頻數肝經陰虛也兩目
連劄肝經風熱也作嘔懶食胃氣虛弱也泄濁後重

脾氣虛弱也用補中益氣湯六味地黃丸而痊○舉人余時正子傷食發丹毒服發表之劑手足抽搐服抱龍丸目瞓氣喘痰盛余謂此脾胃虧損而變慢驚也無風可祛無痰可逐乃虛象也遂用六君子加附子一劑而安再劑而愈○一小兒病後遇驚即痰盛咬牙抽搐搖頭作瀉却服腦射硃砂等劑以致慢驚而卒

驚搐

小兒驚抽之症必有痰或因驚而痰聚或因痰而致驚
古人治驚方中俱兼痰藥必須先治其痰然後瀉火清
神若痰壅塞胸膈不去則瀉火清神之藥無所施其功
也二陳湯加竹瀝入少薑汁最穩痰重者滾痰丸白餅
子利驚丸下之滾痰丸下熱痰白餅子利驚丸下痰積
在上者宜吐之重則用藥吐輕則探吐之若不必吐下
以二陳為主脾虛有熱痰加白术芩連風痰調結加南
星貝母枳實胃虛生痰加白术麥芽竹瀝

愚按前症若因心肝二經風熱熾盛兩目連劄四肢抽搐宜治肝清心若因心經蘊熱呴呼戰慄宜清熱安神若因肺感風邪氣急喘促宜治痰理肺若因飲食停滯噯吐困睡宜消導健脾若因脾肺虛弱而風痰壅盛以致前症但宜補中益氣為主若執用祛風治痰理氣之劑則氣散陰消而促其危矣○大尹劉應昌子患瘰癧略用化痰之劑虛症悉至殊類驚風又服祛風至寶丹小便頻數肢體抽搐或兩目連劄

咬牙呵欠或作嘔懶食大便重墜或泄瀉此土傷而
木勝也用補中益氣湯六味地黃丸而痊○冬官朱
小溪子項間結核面色痿黃肌體消瘦咬牙抽搐頭
搖目劄此肝木克脾土也用六君子湯九味蘆薈丸
而愈○憲幕顧斐齋玄孫二周項結核兩臂反張索
敗毒之藥余意其症屬風熱傷肝血燥筋攣未敢付
藥翌早請治果係前症遂與六味丸一服清晨灌之
午後肢體如常○儒者王文遠子患癩癰痰盛發搐

服金石香燥之劑手足筋攣此肝血復傷而致急驚風也遂用加味小柴胡加釣藤山梔芍歸一劑又以六味丸料加五味麥門煎服而安

小兒忽然驚搐目上視搖頭咬牙症候怪異世俗多作肝經有餘之症投以驚藥豈知飲食停滯痰涎壅積亦多類驚者便須審察有無傷積腹痛胸滿嘔吐惡食輕則消滯化痰重則探吐滯積而後調之又有因感冒吐瀉而發熱氣血虛為熱所迫雖見驚症不可即服驚藥

但調治吐瀉感胃則氣自定熱自退而驚自除矣

愚按前症若因肝木侮脾土用六君子加芍藥木香
柴胡若因脾土虛而自病用五味異攻散大凡飲食
停滯痰積壅滿而見驚症實因脾土虛弱不能運化
所致但健脾胃則食自消痰自化若輕用驚藥風藥
反所以成其風而重其病也況脆嫩臟腑安能受峻
厲之劑耶若專治其病則誤矣○姚儀部子每停食
身發赤暈用清中解鬱湯而愈後患搖頭咬牙痰盛

發抽吐出酸味待其吐盡翌日少以七味白朮散後
日以參苓白朮散調理脾胃遂不復患大抵吐後兒
安不必更服藥也○一小兒停食服通利之劑作嘔
腹脹此脾胃復傷也用補中益氣湯而愈○一小兒
兩目動劄手足發搐數服天麻防風丸之類以祛風
化痰前症不愈其痰益甚得飲食諸症稍愈視其準
頭及左頰色青黃余曰脾主涎此肝木制脾土不能
統攝其涎非痰盛也遂用六君子湯加升麻柴胡鉤

藤二劑飲食漸進諸症漸愈又用補中益氣而安

小兒用藥不宜峻厲

小兒驚藥皆些小丸散多峻厲取其易於成功以之治
肝心有餘之症對病則可中病宜即止不可以為常也
病勢輕淺只用輕劑病退便宜和中調理如牛黃丸三
四十味亂雜殊甚涼驚丸非氣壯實肝火旺者不宜抱
龍丸亦多不見效且麝腦香辛太甚走散真氣又傷脾
胃元氣虛則病愈生矣

愚按小兒之症有餘便屬肝經不足便屬脾經蓋有餘是病氣也不足是元氣也凡病氣有餘元氣不足當補不當瀉况脆嫩臟腑安能受峻厲之藥前論厥有旨哉○一小兒數歲每停食輒服峻厲之劑後患肚腹膨脹或嘔吐泄瀉余先用六君子湯諸症漸愈又用補中益氣湯胃氣漸復

驚後目動咬牙

驚後目微動及咬牙固為肝虛亦虛中有熱虛者血不

足熱者氣有餘水不足無以制火而火動故也但牙床屬胃脾胃虛而有熱亦見微咬不可專歸肝腎當以補脾為主加黃連芍藥川芎便是瀉肝氣補肝血也生地黃涼心血故導赤散宜用之熟地黃補腎血故地黃丸宜用之凡肝腎虛症見者於脾胃藥加地黃可也或以目劄咬牙為肝腎虛專服地黃丸豈不泥膈生痰適有以妨於脾胃也

愚按前症亦有肝熱生風風入於目目系牽動則目

連劄熱入於目筋脉拘緊則目直視若面赤仰卧搖頭咬牙此則心熱之所致也又當別其虛實肝實則渴青丸虛則地黃丸心實則導赤散虛則粉紅丸若脾胃虛熱補中益氣湯加芍藥山梔以實脾土制肝木若肝腎虛熱用六味地黃丸以補腎水生肝木○奚氏女六歲忽然發驚目動咬牙或睡中驚搐痰涎壅盛或用化痰祛風等藥益甚余曰面青而見前症乃屬肝木冠制脾土不能攝涎而上湧也當滋腎水

生肝血則風自息而痰自消矣遂用六味丸而愈
一小兒患前症痰涎自流用驚風之藥其症益甚脾
胃益虛視其面色瘦黃口吐痰涎用六君子補中益
氣湯而愈

小兒好睡

小兒時時好睡乃脾虛困倦也不必用溫膽湯睡中驚
動不安是心血虛而火動也蓋心虛則驚動宜清心安
神養血降痰又胸膈有痰亦作驚動又脾胃有食鬱滯

不清亦驚動不安此又脾胃與痰所致非由心血也宜消食化痰食去痰除則補脾胃

愚按前症若因心脾氣虛有痰宜用參术茯苓五味以補心氣當歸芍藥棗仁以養心血橘紅半夏以開痰滯若肺脾氣虛胸膈有痰用補中益氣湯以補中氣用膽星天竺黃以化痰涎若因飲食停滯而作用四君子湯以健脾胃用山楂神曲以消飲食若因脾虛而好睡用五味異攻散以補脾氣當歸芍藥以生

脾血若因母飲酒致兒醉好睡者以甘草乾葛煎湯解之不應用四君子湯○楊永興子七歲停食吐瀉後好睡睡中兼驚久治不愈余曰好睡是脾氣虛困也善驚是心血虛怯也蓋心為母脾為子也此心火不能生脾土用補中益氣湯及六味丸加鹿茸治之而愈

出痘發搐

小兒若因出痘而生驚搐不必治驚若身熱耳冷骯冷

疑似未明古方服升麻葛根湯痘已出及出完調理氣血只依丹溪痘瘡法分氣血虛實看紅紫淡白稠密稀疎及叅時令用藥常以脾胃為主虛寒用陳文秀溫補法實熱用解毒法全在活法通變

愚按小兒痘瘡未出則補托之已出及出完則調理之更當察色聽聲辨其多寡表裏虛實而治之庶不有誤世皆宗丹溪錢氏陳氏三家之論又必會而通之與時宜之不至膠柱而鼓瑟也竊謂黑陷耳骯冷

咬牙吐瀉者乃脾土虛敗寒水反來侮土歸腎之惡候也用百祥丸瀉之急以四君子丁香陳皮木香厚朴炮薑以溫補脾土身熱飲水黑陷復起十救一二蓋此症因脾土虛敗寒水乘侮故陳文秀先生云若治寒水於既侮之後何不保脾土於未敗之先此發前人之未發救後世之誤妄况痘瘡發出成膿收靨即癰疽起發腐潰生肌皆脾土元氣使然若黑陷寒戰咬牙泄瀉喘嗽即癰疽陽氣脫陷寒氣內淫之陰

症急用異攻散倍參芪歸朮薑附溫補脾胃不可泥其日期而行解毒托裏等法但見其虛弱便宜滋補脾胃以顧收虧觀丹溪先生治一叟發熱而昏倦其脉大而似數與參芪歸朮陳皮大料二十劑而痘出又二十劑而膿泡成身無全膚又六十劑而安其義可見

益黃散治病

益黃散治脾胃虛冷故用丁香暖胃二皮理胃消食化

痰訶子滻腸胃止泄固氣甘草和中仍加白朮為當若
非虛冷泄濁清白及無食積者去青皮丁香加白朮茯
苓可也溫膽湯除痰止吐加白朮芍藥黃連便是制肝
補脾之藥

愚按益黃散乃溫補脾胃之劑也若嘔吐腹痛泄痢
清白口鼻氣冷者乃寒水反來侮土也宜用錢氏益
黃散若因熱藥巴豆之類或因暑熱傷乳食損其脾
胃而成吐濁口鼻氣熱者乃胃中氣虛風熱也宜用

東垣安胃散

傷風流涕

小兒八歲以下無傷寒雖有感冒傷風鼻塞流涕發熱咳嗽以降痰為主畧加微解凡散利敗毒非幼稚所宜或胃輕者不必用藥候二三日多有自愈

愚按前症若手足冷或腹脹脾虛也用六君子湯加升麻柴胡若腹脹或氣喘肺虛也用四君子湯加柴胡升麻經云肺主氣而司皮毛肺虛則腠理不密外

邪易感凡發表之後其邪既去用補肺肺以實其表
庶風邪不能再入往往表散之後熱嗽不退復行發
表多變壞症○吳江史亥年子傷風用表散化痰之
藥痰盛咳嗽肚腹膨大而色㿠白此脾土虛不能生
肺金也余用六君子湯加桔梗一劑頓愈至三日前
症仍作鼻中流涕此復傷風寒所致用前藥加桑皮
杏仁桔梗而愈○史少叅季子喘嗽胸腹膨脹泄瀉
不食此飲食傷脾土而不能生肺金也用六君子湯

一劑諸症悉愈○史木川子六歲感冐咳嗽發散過
度喘嗽不食用六君子湯加桔梗而愈時四月隨其
父巡視耕種忽發寒戰仍復咳嗽或用發表之劑痰
中有血余曰此成肺癰也次日吐痰兼膿用桔梗湯
而愈後元氣未復大便似痢或用五苓黃連枳實之
類痰喘目劄四肢抽搐余曰此脾氣敗而變慢脾風
也辭不治果然

驚搐等症誤用藥餌

小兒或因驚搐或變蒸或食積或寒熱往來誤服解表瀉痢之劑傷損脾胃氣血難以發生面黃饑瘦目動咬牙髮稀足弱不能行步此屬胃虛非肝腎也當長緩調理復全胃氣可也

愚按藥餌偏勝之味脾胃非所宜也况小兒之疾多因乳食不調寒溫失節虧損脾胃元氣根本不固而邪得以致之亦有因乳母六淫七情飲食起居所致苟不明其本末辨其緩急而誤用峻厲之藥重傷脾

胃生生之氣變症百出從其天亡誰之咎也丹溪先生慈幼論言之詳矣

風癬及脚指常腫

小兒身常發風癬及脚指常紅腫此脾經風熱也用防風通聖散去硝黃加鼠粘子酒炒黃連為末服之亦用防風白芷薄荷黃芩黃連黃芪黃柏煎湯避風而愈

愚按前症若因脾氣不足濕熱下注宜用參芪歸朮以補脾氣升麻柴胡以升陽氣茯苓澤瀉以導濕熱

若因食鬱內熱宜用四君子湯以健脾胃山楂神曲
以消飲食山梔川芎以清肝熱若因風邪欬欬腠理
或浴出見風而患者宜用補中益氣湯以補元氣加
芎芷羌活以散風邪潔古先生云癥發於膚外而多
痛癰隱於膚內而多痒大抵安裏之藥為主發表之
藥為佐○一小兒瘙痒發熱體倦少食此脾肺氣虛
外邪相搏先用消風散二劑隨用補中益氣湯加茯
苓芍藥而愈○一小兒患此作痛熱渴服發表之劑

其症益甚形氣倦急脉浮而數此邪在經絡誤散表而損其真也用人參安胃散補中益氣湯而愈○一小兒作渴發熱用犀角消毒散頓作吐瀉此邪氣上下俱出也其癆果消勿藥自愈○一小兒陰囊赤腫余作胎毒治之而瘥後患發熱痰喘等症診其母有鬱火血熱用解鬱涼血之藥子母俱服而愈又患吐瀉小便赤澁兩目瞤動視其寅卯關脉赤此屬風熱用柴胡清肝散加鈎藤鈎木賊草一劑即愈○一小

兒腿如霞遊走不定先以麻油塗患處砭出惡血其
毒即散用九味解毒散一劑而安○一小兒患之外
勢雖輕內苦便祕此患在臟也服大連翹飲敷神功
散而瘥

小兒無補腎法

小兒無補腎法蓋稟父精而生此天一生水化生之源
腎之根也此根日賴脾胃乳食水穀長養男至十六而
腎始充滿既滿之後婚媾妄用虧損則可用藥補之若

受胎之時稟之不足則無可補稟之原足又何待於補耶

愚按小兒行遲齒遲解顱頸填五軟鶴膝腎疳齒豁
睛白多愁凡此皆因稟受腎氣不足當以六味地黃
丸如鹿茸補之若因精氣未滿而御女以通多致頭
目眩暉作渴吐痰或發熱足熱腰腿痠軟或自汗盜
汗二便濇痛變生諸疾難以名狀余常用六味八味
二丸及補中益氣之劑加減用之無不奏效○一小

兒九歲解癱足軟兩膝漸大不能行履屬腎稟不足
用六味丸加鹿茸三月而能步履○一小兒十四歲
肢體倦怠發熱晡熱口乾作渴吐痰如湧小便淋澀
或面目赤色身不欲衣此亦稟賦不足也用補中益
氣湯及前丸而愈○一小兒十五歲而御女大小便
道牽痛服五苓散之類虛症蜂起與死為鄰余用補
中益氣湯加減八味丸而愈○一小兒十三歲內熱
晡熱形體倦怠食少作渴或用清熱等藥治之虛症

悉具余以為所稟怯弱用六味丸加鹿茸補之不越
月而痊蓋古今元氣虛實不同故也

擬定諸方

治小兒肝經火旺目睛頻動痰氣上升或壯熱驚搐面
色紅脈有力脾胃無傷宜瀉肝火

川芎八分當歸酒洗柴胡 橘紅 枳殼炒天麻各六分

甘草四分白芍藥炒茯苓各八分黃連四分薄荷三分

右每服二錢薑水煎服

愚按前症若肝經風熱而自病宜用本方若肝經血燥而自病宜用六味丸若肝木剋脾土宜用四君子湯加升麻柴胡若肺金剋肝木宜用瀉白散若腎水不能生肝木宜用六味丸若愈後驚悸不寐或寐中發搐咬牙宜用歸脾湯加茯苓五味蓋有餘者邪氣實也不足者真氣虛也凡病有餘當認為不足經云邪之所湊其氣必虛○少叅王陽湖孫八歲傷股骨正體科續之余視其面青而兼黃口角微掣動此乃

肝木侮脾症也且氣血筋骨皆資脾土而生但壯脾氣則所傷自愈遂用六君子湯加釣藤鈎當歸三十餘劑諸症悉愈○一小兒三歲因驚抽搐發熱痰盛久用抱龍丸等藥以清風痰反致面色或赤或青余謂此心肝二經血虛風熱而生痰不足之象也先用六味地黃丸以滋養肝腎佐以六君子湯少加柴胡升麻以調補脾胃諸症頓退而痊

治小兒脾經不足土敗木侮目睛微動四肢微搐或潮

熱往來脾胃有傷飲食少進或泄瀉嘔吐而色黃脉無力宜補脾胃

白术

一錢
三分

黃芪

蜜炙

川芎

當歸

酒洗

陳皮

人參

肉豆蔻

煨神曲

乾葛

各五分

黃連

甘草

炙各四分

芍藥

一錢
炒酒

半夏

白茯苓

各七分

右薑水煎服

愚按前症若因脾胃虛弱用五味異功散補之虛寒者加木香或再加炮薑溫之若因脾氣下陷用補中

益氣湯舉之作渴者用七味白朮散主之若因脾胃虛弱寒水侮土用六君子加木香炮薑溫之若因脾胃虛弱肝木侮土用補中益氣湯加苓芍半夏調之若因肝木太過脾土受制用小柴胡湯加炒山梔平之若因傷魚肉等物宜六君子湯更加山楂砂仁消之若因傷生冷腹痛或漏利清白宜六君子湯加砂仁木香炮薑溫之若因傷辛熱停滯嘔吐酸水或大便積利不快用六君子湯加黃連吳茱萸木香和之

若食積去而泄瀉不止用四君子湯加肉豆蔻補骨
脂木香煨薑以補脾胃若泄瀉止而飲食少思宜用
白朮散以補脾胃○一小兒傷食發熱面赤或用養
胃湯枳實黃連山楂治之更加腹脹午後發熱按其
腹不痛余以為飲食雖化而脾胃復傷用六君子湯
數劑而痊○一小兒傷食發熱嘔吐面赤服消導清
熱之劑飲食已消熱亦如故余曰此胃經虛熱耳用
四君子湯加升麻柴胡各二分四劑而痊○一小兒

傷食發熱面赤抽搐嘔吐氣喘吐痰余以為飲食傷脾發熱肺氣虛弱所致耳用六君子湯再加炒黑黃連山楂各三分一劑順安

餘見各類

治小兒心血虛睡中驚動不安或受驚嚇而作主清心安神降痰

人參 半夏 湯泡酸棗仁去殼炒茯神去心各當歸酒洗橘紅 赤芍各七分 五味子五粒 甘草炙三
杵 分

右水煎入薑汁竹瀝少許入牛黃半分尤妙若溫暖

之月心經多熱加生地黃山梔仁

各五分

麥門冬

七分淡

竹葉若方飲食因驚而停滯者須先消飲食然後治驚驚藥內仍加白朮麥芽以理脾胃蓋驚則氣散宜收補其氣驚則痰聚宜消化其痰

愚按前症若心血不足而心神驚悸者宜用本方若木火太過而心神不寧者宜用導赤散若木火翕合風熱相搏而病者用柴胡梔子散若肝心虛弱木火未濟而病者用六味丸若因脾胃食鬱生痰驚動不

安者宜用四君子湯以健脾神麯半夏麥芽以化痰
山梔芍藥以清熱若因飲食停滯肚腹膨脹或嘔吐
泄瀉宜用六君子湯以健脾用厚朴神麯以消食如
有痰搐驚症仍用本方調治如見肝經之症加鉤藤
鉤方內赤芍藥易以白芍藥治驗見各症類

治小兒食積鬱熱發於肌表潮熱往來主理中清陽明
之熱

乾葛

一錢

白术 炒

山楂

白芍藥

炒各

黃連 炒枳

實
炒
麸
川芎
香附米
炒
升麻
各七分
乾葛
一錢
甘

草
炙草
各三分

右用薑水煎服若食積去後潮熱未除減山楂實
香附川芎加人參黃芪陳皮各五分再加白朮二
三分有

痰加半夏六分

愚按前症若食積去而熱不退用五味異功散以補
胃氣若作嘔少食用四君子加藿香半夏以安中氣
若泄瀉不食宜用六君子湯加升麻柴胡以升補脾

氣若久渴不已宜用補中益氣湯以升補陽氣若虛寒加炮薑木香如不應佐以四神丸以補脾胃若體瘦潮熱口乾大便不調宜用肥兒丸以消疳積若不分脾氣虛實有無食積槩用剋伐消導寒涼清熱之劑復傷脾胃主氣反為難治之症○儒者薛衡甫子年七歲身羸發熱面黃皆以為內傷瘀血欲下之余謂乃脾臟受傷投以六君子湯加煨薑兩服飲食頓進數服諸症全愈○一小兒飲食停滯服消導之劑

余曰此脾胃氣虛故飲食不能剋化也法當調補為善若數用剋伐之劑脾氣益傷飲食愈停矣已而腹內又結一塊寒熱潮熱食少作渴大便不實余用四君子湯飲食漸增又用補中益氣湯而愈○一小兒肚腹膨脹飲食即瀉手足逆冷余以為脾氣虛寒先用人參理中丸後用六君子湯而愈○一小兒常患停滯數服剋伐消導之劑以致脾胃虛甚患吐瀉慢脾風而卒

餘見各症類

治小兒發熱感冒鼻流清涕或咳嗽吐痰輕者且勿藥候一二日多自愈重者用清和之劑

橘紅 半夏炮 桔梗 川芎各五分 甘草 防風各四分

白茯苓 桑皮蜜炙各七分 白术 薄荷 枯黃芩

炒各三分

右每服二錢薑水煎服

愚按前症若腠理不密外邪所感鬱於肺而為患者宜用本方若脾胃氣虛不能生肺金而致患者用補

中益氣湯若脾胃氣實肺氣壅滯而大腸不利者用
瀉黃散若心火上炎消鑠肺金而致咳嗽者用六味
丸大凡元氣素弱或患病日久宜用補中益氣湯為
主加以半夏茯苓桔梗若見發搐咬牙等症皆虛熱
所迫亦宜用之若痰盛少佐以抱龍丸若風邪既退
而熱痰未已但健中氣則痰自化而病自愈若用化
痰利氣之藥則中氣愈虛痰熱愈甚矣○一小兒傷
風咳嗽發熱服解表之劑更加喘促出汗余以為肺

脾氣虛欲用補中益氣湯加五味子補之不信乃服

二陳桑皮杏仁枳殼桔梗之劑前症益甚又加發搐

痰壅余仍用前藥更加鈎藤鈎而痊蓋小兒臟腑脆

嫩氣血易虛所用之藥雖為平和亦有偏勝之味須

審察病氣形氣虛實在表在裏之不同而治之可也

治法見傷風

鼻流涕條

治小兒大便色泔白及小便濁或澄之如米泔者此疳

病也

白术 黃連
炒 薑水 白茯苓 澤瀉 山楂 青皮

分四
甘草 白芍藥
炒各一錢

右薑水煎服

愚按前症若因脾氣虛而兼濕熱者宜用四味肥兒丸若兼泄瀉當以白术散間服

治疳丸小兒要藥

胡黃連 蘆薈 史君子 黃連
各五錢 炒神曲兩

阿魏 青黛
二錢 另研麝香
少許另研

右為末稀糊丸黍米大每服十九清湯下

愚按前方乃肝脾疳症之藥也或內疳或瘡發於外亦效蓋疳乾也或因哺食太早或因恣食甘肥或因峻劑重亡津液虛火上炎或因乳母飲食起居七情勞逸所致○若口內生瘡身體壯熱頸脣赤色或咽乾飲水掌熱便赤盜汗煩熱齒齦虛驚此心經內外疳也宜用安神丸主之若鼻瘡目爛體瘦瘡蘚或耳前後項腋小腹內股玉莖陰丸腫潰小便不調搖頭

側目白膜遮睛羞明畏日肚大青筋口乾下痢此肝
經內外疳也用地黃蘆薈二丸主之○若頭髮稀少
生瘡或穗人中口吻赤爛或腹大脚細吐嘔泄瀉飲
食不思口乾嗜土瀉下酸臭小便白濁合目昏睡惡
聞木音此脾經內外疳也用肥兒丸主之○若鼻外
生瘡咽喉不利脰腫齒痛咳嗽寒熱皮膚皺錯欠伸
少氣鼻痒出涕鼻衄目黃小便頻數此肺經內外疳
也用地黃清肺飲主之○若腦熱身瘦手足如冰寒

熱往來滑漏肚痛口鼻乾渴齒齦潰爛面黧爪黑遍身生瘡耳內出水此腎經內外疳也用地黃丸主之大凡虛火上炎或痘毒上攻名曰走馬疳為患甚速敷雄黃散服大蕪荑湯此症輕則牙齦腐爛唇吻腫痛重則牙齒蝕落頸頰透爛飲食不入者為不治一小兒二歲莖痿濕痒後陰囊焮腫莖中作痛時出白津余以為肝火用龍膽化肝湯六味地黃丸而痊
○一小兒署丸作痛小便赤澁寒熱作嘔乃肝脾之

症用小柴胡湯加山梔車前子茯苓而愈○一小兒
鞞丸腫硬小便黃澁用小柴胡湯加山梔車前子并
蘆薈丸而消○一小兒腹內結塊或作痛或上攻小
便不調用龍膽瀉肝湯蘆薈丸而愈後形氣消鑠發
熱作渴此肝木制伏脾土用補中益氣湯及蘆薈丸
而愈○一小兒自脫胎時兩目赤腫或作痒或生翳
此胎內之肝火也用蘆薈六味二丸而愈○一女子
十五歲患瘰癧身發赤暈形氣倦急此肝火血虛所

致用加味逍遙散而赤暈愈用益氣湯六味丸而療

癰消○一小兒下疳潰爛發熱作痛一小兒莖中作痒不時搔捻一小兒莖中潰痛小便祕濁日晡尤甚

一小兒目痒出水或莖間結核或兩腿連劄或陰囊

搔痒俱屬肝火皆用九味蘆薈丸並愈餘見各類

治小兒大病後面黃肌瘦目時動齒微咬髮稀少未能

大行因誤服解表渴利傷尅諸藥而致者宜長緩調理復全胃氣

白术

一錢
二分

白芍藥

酒炒

白茯苓

各八分

人參

陳皮

川芎

各六分

甘草

黃芪

蜜炙

當歸

酒洗各四分

半夏

山

查各六分

右用薑棗水煎服

安神鎮驚丸驚退後調理安心神養氣血和平預防之

劑

天竺黃

另研人參

茯神

南星

薑製各五錢

酸棗仁

炒

麥門冬

當歸

酒洗

生地黃

酒洗

赤芍藥

炒各三錢

薄荷

木通 黃連

炒薑汁山梔

辰砂另牛黃研

另龍骨火煅

各二錢一錢
另研

右為末蜜丸菉豆大淡薑湯送下每服三五丸

愚按前二方根本之治防微杜漸之法也但鎮驚丸內多苦寒辛散分利之味病後不宜輕用患復傷胃氣而變生他症也皆飲食不節致生他症當消導為主若脾胃損傷而見他症當健中氣大凡病後元氣未復或因尅伐之劑元氣復傷而見前症但用升補

陽氣為主諸症自愈若專攻其病則誤矣○一小兒
七歲患急驚將愈而發熱驚悸或用祛風化痰之劑
更加驚搐吐痰喘嗽腹膨少食惡寒又用抱龍等丸
更加大便似痢寒熱往來殊類風症先君視之以為
脾氣虧損諸經無所資養而然用四君子湯為主少
用升麻柴胡以升補陽氣而愈

治小兒齒腫流涎腮腫馬牙陽明之熱

升麻 川芎 白芍藥 半夏炒各七分乾葛 生甘

草防風

黃連

酒炒各五分

石膏

火煅過

白朮

各一錢

芷

三分

右水煎每服二錢若能漱藥者則含藥漱而吐之漱藥不用白朮半夏

愚按馬牙重舌因胎毒胃熱所致若用線針刺破出血即愈不必服藥若因飲食所傷脾胃虛熱而致宜用七味白朮散若服熱藥損傷脾胃發熱而致或口舌生瘡宜用人參安胃散若久病脾胃虛熱口內如

無皮狀宜用七味白朮散若脾經陰血不足午後益甚宜用四物湯加白朮茯苓炙草若脾經陽氣下陷午後益甚宜用補中益氣湯並用茱萸塗脚心若疳積虛火上炎齦齒腐爛當從疳治亦有滯頤口角流涎此由脾氣虛冷不能制其津液也宜用溫脾散若脾經實熱舌縱涎下宜用瀉黃散大凡小兒四時皆以養元氣健脾胃為主若屢有痰症屢服驅風瀉火之藥多患前症其輕者能節飲食慎調理不藥自愈

序次丹溪小兒痘瘡治法

小兒痘疹大抵與傷寒相似發熱煩躁臉赤唇紅身痛頭疼乍寒乍熱噴嚏呵欠嗽喘痰涎始發之時有因傷風傷寒而得有因時氣傳染而得有因傷食嘔吐而得有因跌撲驚恐畜血而得或為竄眼驚搐如風之證或口舌咽喉肚腹疼痛或煩躁狂悶昏睡或自汗或下痢或發熱或不發熱證候多端卒未易辨亦須以耳冷骭冷足冷驗之蓋瘡疹屬陽腎藏無症耳與骭足俱屬於

腎故腎之所部獨冷又不若視其耳後有紅脉赤縷為
真於此可以稽驗矣調護之法首尾俱不可汗下但溫
涼之劑兼而濟之解毒和中安表而已虛者益之實者
損之冷者溫之熱者平之是為權度借喻而言亦如庖
人籠蒸之法但欲其鬆耳蓋毒根於表如苟妄汗則榮
衛一虛重令閉泄轉增瘡爛由是風邪乘間變症者有
之毒根於裏如苟妄下則內氣一虛毒不能出而返入
焉由是土不勝水變黑歸腎身體振寒耳聰反熱眼合

肚脹其瘡黑陷十無一生汗下二說古人深戒以此觀之瘡疹症狀雖與傷寒相似而其治法實與傷寒不同傷寒從表入裏瘡疹所發從裏出表故也如欲解肌乾葛紫蘇可也其或氣實煩躁熱熾大便秘結則與犀角地黃湯或人參敗毒散又或紫草飲多服亦能利之故雖云大便不通者少與大黃尤宜仔細斟酌之若小便赤少者分利小便則熱氣有所滲而出凡熱不可驟遏但輕解之若無熱則瘡又不能發也

凡瘡疹春夏為順秋冬為逆○瘡疹分人清濁就形氣上取勇怯○凡已發未發並與紫蘇飲但覺身熱症似傷寒若未見瘡疑似未明且先與惺惺散參蘇飲或人參羌活輩熱甚則與升麻葛根湯人參敗毒散但一見紅點便忌葛根湯恐發得表虛也○凡痘瘡初欲出時身發熱鼻尖冷呵欠咳嗽面赤方是痘出之候便宜服升麻葛根湯加山楂大力子其瘡稀疎而易愈○凡痘初出時或未見時宜服後方多者令少重者令輕方以

絲瓜近蒂三寸連瓜子皮燒灰存性為末砂糖拌乾喫入硃砂末亦可又方硃砂為末蜜水調服多者可減少者可無○凡痘瘡發熱之時便以惡實子為末蜜調貼顛門上免有患眼之疾○凡初出之際須看胸前若稠密急宜消毒飲加山楂黃芩酒洗紫草減食加人參○初出之時色白者便大補氣血參芪芍木升麻乾葛甘草木香丁香酒洗當歸白芍藥若大便泄加訶子肉豆蔻○初起時自汗不妨蓋濕熱薰蒸而然故也有初起

時煩躁譫語狂渴引飲若飲水則後來齷不齊急以涼藥解其標如益元散之類亦可用○凡瘡已出可少與化毒湯○出不快者加味四聖散紫草飲子紫草木香湯紫草木通湯或快斑散絲爪湯○出太甚者人參敗毒散犀角地黃湯疎則無毒密則有毒以涼藥解之雖數貼亦不妨無害眼之患爐灰色白靜者作寒看○齊勇者燥者忻發者作熱看黑屬血熱涼血為主○白屬氣虛補氣為主○中黑陷而外白起得遲者則相兼而

治○凡痘瘡分表裏虛實吐瀉少食為裏虛不吐瀉能食為裏實裏實而補則結癰毒陷伏倒鑿為表虛灰白者亦表虛或用燒人屎紅活綻凸為表實表實而復補表則要潰爛不結痂○痘瘡分氣虛血虛用補藥氣虛者人參白朮加解毒藥血虛者四物湯中加解毒藥痘瘡分氣血虛實多帶氣血不足虛則黃芪生血活血之劑助之畧佐以風藥實則白芍藥為君黃芩亦為君佐以白芷連翹續斷之類○調解之法活血調氣安表和

中輕清消毒溫涼之劑兼而治之二者得兼而已溫如
當歸黃芪木香輩涼如前胡乾葛升麻輩佐之以川芎
白芍藥枳殼桔梗羌活木通紫草之屬則可以調適矣
○黑陷二種因氣虛而毒氣不能盡出者酒炒黃芪紫
草人參輩黑陷甚者亦用燒人屎蜜水調服出子和方
○痒瘍者於形色脉上分虛實實則脉有力氣壯虛則
無力虛痒以實表之劑加涼血藥實痒如大便不通者
以大黃寒涼之藥少與之下其結糞○氣怯輕者用淡

蜜水調滑石末以羽潤瘡上○瘡乾者宜退火止用輕劑荆芥升麻葛根之類○濕者用渴濕乃肌表間濕宜用風藥白芷防風之類○上引用升麻葛根下引用檳榔牛膝助以貝母忍冬草白芷爪姜之類○若咽喉痛者大如聖散鼠粘子湯○喘滿氣壅者麻黃黃芩湯煩渴者甘草散烏梅湯下痢嘔逆者木香理中湯○顏色正者如上治將欲成就却色淡者宜助血藥用當歸川芎酒洗芍藥之類或加紅花○將成就之際却紫色者

屬熱用涼藥解其毒升麻葛根酒炒黃芩黃連及連翹之類甚者犀角大解痘毒○灰白色將麝時如豆殼者蓋因初起時飲水多其麝不齊俗呼倒麝不好但服實表之劑消息他大小便如大便秘通大便小便秘通小便○小便赤澁者大連翹飲甘露飲○大便秘結內煩外熱者小柴胡湯加枳殼最當或少用四順清涼○瘡疹用藥固有權度大小二便一或秘焉則腸胃壅遏脉絡凝滯毒氣無從發泄眼閉聲啞肌肉黧黑不旋踵而

告變矣陷入者加味四聖散更以胡荽酒薄傳其身厚傳其足噴其衣服併以厚綿蓋之若猶未也獨聖散入木香煎湯若其瘡已黑乃可用錢仲陽宣風散加青皮主之錢氏云黑陷青紫者百祥丸下之不黑者謹勿下余知其所下者漏膀胱之邪也又云下後身熱氣溫欲飲水者可治水穀不消或寒戰者為逆余知其脾强者土可以治水也百祥丸太峻當以宣風散代之漏後溫脾則用人參茯苓白朮等分厚朴木香甘草各半為妙

蓋瘡發肌肉陽明主之脾土一溫胃氣隨暢獨不可消
勝已泄之腎水乎此錢氏不刊之秘旨也○其壞瘡者
一曰內虛泄濁二曰外傷風冷三曰變黑歸腎○近時
小兒痘瘡止宗陳文忠木香散異攻散殊不知彼時立
方之時為運氣在寒水司天時令又值嚴冬大寒為因
寒鬱遏痘瘡不紅綻故用辛熱之劑發之今人不分時
令寒熱一槩施治誤人多矣時值溫熱山野農家貧賤
之人其或偶中也○丹溪痘瘡治法最為明備近世通

用陳文忠木香異功等方乃一偏之術若痘瘡虛怯淡
白色痒癩此屬虛寒宜用陳文忠方若發熱壯盛齊勇
紅紫色燥痒此屬熱毒急宜涼血解毒自陳文忠方盛
行後屬虛寒者率得生屬熱毒者悉不救痘自胎毒古
人治法只解毒然氣血虛則逆毒氣不出及不能成就
故陳文忠之法亦千載妙訣補前人之未備者但溫補
之法既行而解毒之旨遂隱故救得一邊又害了一邊
今必詳究丹溪二法通用斯無誤也○痘瘡屬虛寒者

直可延至十數日後方死屬毒盛轉紫色者不過七八日蓋痘是胎毒自內出外二三日方出齊毒氣方在內出至六日則當盡發於表七八九日成膿而結痂矣若毒氣盛不能盡出過六日毒反內入臟腑故須於六日以前毒氣該出之時急服涼血解毒之藥以驅出之六日以後豈無及矣故其死最急若虛弱毒氣少者只是氣血不足不能貫膿成就故綿延日久而後死此虛實輕重之分也○痘瘡多者是毒氣多便先宜解毒然多

則恐氣血周貫不足故隨後亦宜兼補藥以助成膿血
愚按痘疹之疾乃胎稟之熱毒由內發外雖為有餘
之症當渴不當補然兒體有虛實積毒有重輕又在
變而通之考之錢陳二先生雖俱名家然就而折衷
之則陳為較優蓋錢之用藥偏於清涼而陳之治法
溫涼並行以其深究陰陽造化之妙故於病之真寒
假熱與夫真熱假寒罔不知之真而見之定隨症異
宜未嘗執泥假如病屬虛熱而元氣未至虧損者施

之以錢氏之法則固當矣若病氣元氣俱虛或俱實者而不以陳法治之鮮不致誤且小兒之痘疹譬即大人之癰疽治法無異其熱毒蘊於內臟致二便不利煩熱作渴脉沉實須用托裏疏通和榮衛三法觀陳氏異功散人參白朮散前胡枳殼湯等方其藥品深為得宜治者詳訂而遵之可也



薛氏醫案卷二十四